



## **Kerajaan terus jejak warga Malaysia jadi mangsa penipuan kerja yang masih hilang – Saifuddin**

Mohd Zalani Md Atan

Oktober 23, 2022 15:07 MYT

KUANTAN: Kerajaan Malaysia tetap akan menjejak warganya yang masih belum dijumpai selepas menjadi mangsa sindiket penipuan pekerjaan sama ada di Kemboja, Laos, Myanmar atau Thailand.

Setakat ini seramai 313 mangsa telah berjaya diselamatkan dengan 255 orang telah dibawa pulang dan 58 lagi masih di depoh tahanan di negara-negara tersebut dalam proses untuk dibawa balik.

Menurut Menteri Luar, Datuk Seri Saifuddin Abdullah, Malaysia tidak akan membiarkan walau seorang pun rakyatnya tertinggal dan usaha mengesan masih dilaksanakan.

"Pada waktu yang sama kita masih menjejak beberapa lagi rakyat Malaysia yang dilaporkan hilang atau masih belum dapat diselamatkan. Pokok pangkalnya kita akan cuba menyelamatkan semua dan tidak seorang pun akan kita biarkan tertinggal di sana," katanya.

Beliau ditemui di Program Gerai Prihatin di perkampungan Cenderawasih, di sini ada Ahad.

Tambah Saifuddin walaupun semakin berkurangan, kerajaan masih menerima satu dua laporan mengenai kehilangan rakyat Malaysia.

"Saya boleh katakan laporan itu semakin sedikitlah tidaklah macam satu ketika dulu setiap minggu kita terima terdapat dua tiga laporan.

"Yang sekarang ini dah ada dah seminggu yang kita tak dengar apa-apa laporan baharu walaupun secara tepat itu tak ada kepada saya namun yang kita tahu semakin berkurangan. Mudah-mudahan selepas ini tiada lagi laporan kehilangan mereka yang ditipu akibat jenayah ini," katanya.

Menurut Saifuddin lagi, kesemua mangsa yang pulang didapati berkeadaan sihat tetapi jika ada daripada mereka yang mempunyai aduan mereka dikasari atau dicerca, aduan itu perlu dibuat semasa mereka di negara tersebut supaya siasatan mudah dilakukan.